


Los ntawm Thawj Tswj Hwm  
Thomas S. Monson



# Txais Kev Hu Ua Hauj Lwm

**T**haum tus Yaj Saub Yauxej Xamiv hu Txwj Laug Heber C. Kimball (1801–68) mus “qhib lub qhov rooj ntawm kev cawm seej” mus ua tub txib nyob hauv Akiv Teb, ua rau Txwj Laug Kimball xav tias nws tsis tsim nyog.

Nws sau hais tias, “Au, tus Tswv, kuv yog ib tug tsis txawj hais lus, thiab yeej tsis tsim nyog ua tej hauj lwm no.”

Txawm li ntawd los, Txwj Laug Kimball mus ua raws li txoj kev hu no, es nws hais tias: “Tag nrho tej kev xav no tsis tau ua rau kuv tawm ntawm txoj kev ua kuv tej luag hauj lwm no; tib lub sij hawm uas kuv to taub kuv Leej Txiv Saum Ntuj Ceeb Tsheej lub siab xav, kuv txiav txim siab kuv yuav mus txawm raug teeb meem dab tsi los xij, ntseeg hais tias Nws yuav siv Nws lub hwj chim txhawb nqa kuv, thiab muab txhua yam txiaj ntsim uas kuv xav tau rau kuv.”<sup>1</sup>

Kuv cov kwv thiab cov muam uas Vajtswv tau hu los ua hauj lwm ua tub txib ntxhais txib, Vajtswv tau hu nej rau txoj hauj lwm no vim nej, ib yam li Txwj Laug Kimball, xav ua hauj lwm rau Vajtswv (Q&K 4:3) thiab vim nej twb npaj lawm thiab nej tsim nyog.

Nej tej khub niam txiv laus, Vajtswv hu nej ua txoj hauj lwm no vim rau qhov tej uas tau hais lawm thiab. Tsis yog nej xav ua hauj lwm pab xwb, tiam sis nej kuj muaj laj lim tswv yim uas nej txais tau los ntawm ntau xyoo ntawm kev txi, kev hlub, thiab kev kawm uas nej Leej Txiv Saum Ntuj Ceeb Tsheej siv tau kom tshoov tau Nws cov tub thiab cov ntxhais uas nrhiav qhov tseeb lub siab. Nyaj nej tau kawm hais tias peb yeej yuav tsis hlub tus Tswv tiag tiag ua ntej peb ua hauj lwm pab Nws los ntawm qhov uas peb pab lwm tus.

Rau nej txoj kev xav ua tub txib ntxhais txib, nej yuav ntxiv kev ntseeg thiab kev nyob ruaj khov kho, kev ua

siab loj thiab kev ntseeg yus tus kheej, kev rau siab thiab kev nyaj mus tom ntej, kev mob siab thiab kev fij siab. Cov tub txib ntxhais txib uas fij lawv tus kheej tseg yuav ua tej txuj ci tseem ceeb nyob hauv lawv qhov chaw tshaj tawm txoj moo zoo.

Thawj Tswj Hwm John Taylor (1808–87) hais txog tej uas cov tub txib ntxhais txib yuav tsum muaj li no hais tias: “Cov txiv neej [thiab cov poj niam thiab tej khub niam txiv] uas peb xav kom tshaj tawm txoj moo zoo rau tib neeg yog cov txiv neej uas muaj kev ntseeg Vajtswv; txiv neej uas ntseeg lawv txoj kev teev ntuj; txiv neej uas hwm lawv lub pov thawj hwj; txiv neej uas muaj . . . Vajtswv lub hwj chim puv npo.” . . . Peb xav muaj cov neeg uas muaj tus Vaj Ntsuj Plig Dawb Huv thiab Vajtswv lub hwj chim puv npo[,] . . . cov neeg uas ncaj ncees, tsim txiaj thiab dawb huv.”<sup>2</sup>

Tus Tswv tau hais tias:

Vim saib seb thaj teb twb dawb zoo mus sau qoob loo lawm; thiab xyuas seb, tus uas cev nws rab liag sib zog mus hlais, tus ntawd yuav tau coj los khaws cia rau hauv txhab xwv kom nws yuav tsis piam sij, tiam sis yuav coj tau kev cawm seej los rau nws tus ntsuj plig;

Thiab kev ntseeg, kev cia siab, kev siab hlub thiab kev hlub, nrog lub qhov muag uas ntsia ntsoov rau Vajtswv lub yeeb koob, ua rau nws tsim nyog ua txoj hauj lwm no (saib Q&K 4:4–5).

Vajtswv tau hu nej dhau los ntawm kev tshoov siab. Kuv ua tim khawv tias tus uas Vajtswv hu, Vajtswv pab ua kom tau. Nej yuav txais Vajtswv txoj kev pab thaum nej thov Vajtswv ua hauj lwm nyob hauv tus Tswv lub vaj txiv hmab.

Nej yuav txais raws li tej lus cog tseg zoo kawg uas tus Tswv hais rau cov tub txib nyob hauv lub caij nyoog kawg

no, raws li sau rau hauv phau Lus Qhuab Qhia thiab Kev Khi Lus, hais tias, Nws yuav mus ua peb ntej. Nws yuav nyob ntawm peb sab xis thiab ntawm peb sab laug, thiab Nws tus Ntsuj Plig yuav nyob hauv peb lub siab, thiab Nws cov tim tswv saum ntuj yuav nyob ib ncig ntawm peb, kom thiaj txhawb nqa tau peb (Q&K 84:88).

Thaum nej ua hauj lwm pab lwm tus, nej yuav ntsib phooj ywg thiab nco ntsoov lub sij hawm ntawv mus ib txhis. Kuv tsis paub ib qhov chaw uas muaj kev zoo siab nplua mias npaum li qhov chaw tshaj tawm txoj moo zoo.

Nim no, xav hais lus rau cov txwj laug, cov muam, thiab tej khub niam txiv uas, txawm yog vim li cas los xij, tej zaum nyob tsis tau hauv qhov chaw tshaj tawm txoj moo zoo kom tas sij hawm: Tus Tswv hlub nej. Nws zoo siab rau nej txoj kev txi. Nws paub tias nej poob siab. Cia li paub hais tias Nws tseem muaj ib txoj hauj lwm rau nej ua. Tsis txhob cia Dab Ntxwg Nyoog hais tias tsis yog li ntawd. Tsis txhob poob siab; tsis txhob nyuaj siab; tsis txhob tu siab.

Ib yam li kuv tau hais nyob hauv lub tuam rooj sab laj tsis ntev tom qab tau hu kuv coj lub Koom Txoos hais tias: “Tsis txhob ntshai. Cia li zoo siab. Yuav muaj kev tshav ntuj thaum yav tom ntej ntau npaum li nej txoj kev ntseeg.”<sup>3</sup> Kev cog lus no yeej muaj tseeb rau nej. Yog li ntawd tsis txhob cia nej txoj kev ntseeg ploj mus, vim tus Tswv yeej tsis tau poob siab txog nej. Cia li ua raws li nej tej kev khi lus thiab mus tom ntej.

Neeg ntiatj teb xav tau Yexus Khetos txoj moo zoo. Thov kom tus Tswv foom koob hmoov rau tag nrho Nws Haiv Neeg Ntseeg—txawm peb ua hauj lwm qhov twg los—kom lawv xav ua tub txib ntxhais txib.

#### LUS CIM

1. Heber C. Kimball, nyob hauv Orson F. Whitney, *Life of Heber C. Kimball*, 3rd ed. (1967), 104.
2. *Teachings of Presidents of the Church: John Taylor* (2001), 73.
3. Thomas S. Monson, “Be of Good Cheer,” *Liahona*, Tsib Hlis Ntuj 2009, 92.

---

#### QHIA LOS NTAWM TSAB XOY NO

Txawm peb tsis yog cov tub txib ntxhais txib los, peb txhua tus muaj cib fim qhia txoj moo zoo thiab pab lwm tus uas nyob ib puag ncig. Cia li xav seb puas xav qhia txog zaj no nrog ib zaj uas tsis ntev tas los tau hais nyob hauv lub tuam rooj sab laj txog lub ntsiab no, xws li “Kev Qhia txoj Moo Zoo uas Tau Muab Txum Tim Rov Qab Los” los ntawm Txwj Laug Dallin H. Oaks ntawm Pawg Kaum Ob tug Thwj Tim (*Liahona*, Kaum Ib Hlis Ntuj 2016, 57). Tej zaum koj kuj yuav xav sib tham txog

sob lus “tus uas Vajtswv hu, Vajtswv pab ua kom tau” nrog cov uas koj qhia. Lawv tau xav tias Vajtswv txhawb nqa lawv li cas thaum lawv ua cov tub txib tej hauj lwm thiab ua qhov uas Vajtswv hu lawv? Tej zaum koj yuav xav caw cov uas koj qhia kom lawv thov Vajtswv pab lawv muaj zog thiab txais kev tshoov siab kom lawv thiaj paub qhia txoj moo zoo rau lawv tsev neeg, phooj ywg, thiab cov neeg zej zog.

## COV HLUAS

### Ib tug Tub Txib uas Tsis Muaj daim Npe

Los ntawm Kirsti Arave

Nyob hauv kuv lub tsev kawm ntawv kuv muaj ib tug xib hwb uas muaj tus xeeb ceem ua rau yus ntshai qhia tias yus xav txawv nws txog ib yam dab tsi. Muaj ib hnuv peb sib tham txog cov tub txib ntxhais txib ntawm Haiv Neeg Ntseeg hauv Hnuv Nyoog Kawg. Kuv paub tias kuv txawj teb nws tej lus nug, tiam sis kuv xav tias kuv yuav tsum tsis txhob teb. Yog li ntawd kuv hais me ntsis xwb kom nws txaus siab.

Tau ob peb lim tiam ua rau kuv xav txog wb txoj kev sib tham tas li xwb. Thaum kawg, ua rau kuv xav tias kuv yuav tsum muab ib Phau Ntawv Maumoos rau nws thiab kos cim rau ob peb zaj txog kev ua tub txib txoj hauj lwm. Qhov xav li no ua rau kuv ntshai heev, tiam sis kuv xav li no tsis tu tsis tseg. Kuv paub tias yog kev tshoov siab uas kuv yuav tsum mloog.

Ob lub hlis tom qab ntawd, kuv twb npaj Phau Ntawv Maumoos lawm. Tas ib hnuv ua rau kuv xav tias phau ntawv no hnyav kawg nyob hauv kuv lub hnuv ev khoom. Lub sij hawm ib me pliag xwb uas kuv muab phau ntawv no cev rau nws ua ntej peb yuav phav thaum lub caij no no yog lub sij hawm txaus ntshai tshaj plaws nyob hauv kuv lub neej.

Thawj hnuv kuv rov qab los, kuv hla dhau nws hoob kawm tiam sis kuv ntshai mus haud. Kuv hnov nws hu kuv, ces nws muab ib daim ntawv pub rau kuv. Nyob hauv kis tsev kuv twb nyeem nws daim ntawv. Nws sau hais tias nws twb kawm “ntev zog” txog tej lus uas kuv muab cim tseg, thiab nws pib to taub vim li cas kuv ntseeg.

Ua rau kuv zoo siab xav qhia lwm tus txog txoj moo zoo, thiab tam sim no kuv zoo siab kawg xav pab ua hauj lwm rau kuv Leej Txiv Saum Ntuj Ceeb Tsheej ua ib tug tub txib.



# Lub Hwj Chim Pov Thawj Hwj Los ntawm Kev Ua Raws Li Kev Khi Lus

*Ua tib zoo thov Vajtsuv kawm tej yam no thiab nrhiav kev tshoov siab seb koj yuav tsum qhia dab tsi. Qhov uas Vajtsuv cov ntxhais to taub lub hom phiaj ntawm lub Koom Haum Niam Tsev yuav npaj lawv li cas kom txais tau cov koob hmoov ntawm txoj sia nyob mus ib txhis?*

**Kev Ntseeg Tsev Neeg  
Kev Pab**

**T**xwj Laug Neil L. Andersen ntawm Pawg Kaum Ob tug Thwj Tim hais tias, “Kuv xav hais rau . . . txhua leej txhua tus hais tias peb muaj peev xwm ua neej nyob txhua lub sij hawm ‘nrog cov koob hmoov ntawm lub hwj chim pov thawj hwj.’ . . . Thaum nej tsim nyog ua cov kab ke ntawm lub pov thawj hwj, tus Tswv yuav muab dag zog, kev kaj siab lug, thiab lub zeem muag nyob mus ib txhis ntxiv rau nej. Txawm nej muaj xwm txheej dab tsi los yog, nej lub tsev yuav ‘txais koob hmoov ntawm lub hwj chim pov thawj hwj.’”<sup>1</sup>

Peb yuav ua li cas kom txais tau lub hwj chim pov thawj hwj hauv peb lub neej? Txwj Laug M. Russell Ballard los ntawm Pawg Kaum Ob tug Thwj Tim qhia rau peb nco ntsoov tias “cov uas tau ua kev cai raus dej ces tau txais lawv vaj txiaj ntsim nyob hauv tus Tswv lub tsev yeej muaj cai txais tau cov koob hmoov zoo kawg nkaus. Vaj txiaj

ntsim yeej yog ib lub txiaj ntsim hwj chim . . . [thiab] peb Leej Txiv Saum Ntuj Ceeb Tsheej yeej muaj siab dawb pub Nws lub hwj chim rau peb.” Nws qhia kom peb nco ntsoov tias cov txiv neej thiab cov poj niam “txais tau lub hwj chim ntawm lub vaj txiaj ntsim” nyob hauv lub tuam tsev, “uas txhais tau hais tias yog lub hwj chim ntawm lub pov thawj hwj.”<sup>2</sup>

Linda K. Burton, lub Koom Haum Niam Tsev tus Tuam Thawj Tswj Hwm, hais tias: “Vim lub hwj chim pov thawj hwj yog ib yam uas peb txhua tus xav muaj nyob hauv peb tsev neeg thiab nyob hauv peb tej tsev, *peb* yuav tsum ua li cas kom caw lub hwj chim los rau hauv peb lub neej? Yeej yuav tsum coj ncaj ncees kom txais tau lub hwj chim pov thawj hwj.”<sup>3</sup>

Thawj Tswj Hwm Russell M. Nelson, Thawj Tswj Hwm ntawm Pawg Kaum Ob tug Thwj Tim hais tias, “yog peb txo hwj chim rau tus

Tswv thiab thov kom Nws qhia peb, Nws yuav qhia peb kom *peb* paub yuav ua li cas txais tau *Nws* lub hwj chim.”<sup>4</sup>

## **Vaj Lug Kub thiab tej Ntaub Ntawv Xov Xwm Ntxiv**

1 Nifais 14:14; Lus Qhuab Qhia thiab Kev Khi Lus 121:36; 132:20; [reliefsociety.lds.org](http://reliefsociety.lds.org)

### **LUS CIM**

1. Neil L. Andersen, “Lub Hwj Chim ntawm lub Pov Thawj Hwj,” *Liahona*, Kaum Ib Hlis Ntuj 2013, 92, 95.
2. M. Russell Ballard, “Men and Women and Priesthood Power,” *Liahona*, Cuaj Hlis Ntuj 2014, 36.
3. Linda K. Burton, “Priesthood Power— Available to All,” *Liahona*, Rau Hli Ntuj 2014, 21.
4. Russell M. Nelson, “Tus Nqi ntawm lub Hwj Chim Pov Thawj Hwj,” *Liahona*, Tsib Hlis Ntuj 2016, 69.

### **Xav Txog Qhov No**

Qhov uas peb ua raws li peb tej kev khi lus ua li cas kom peb txais lub hwj chim pov thawj hwj?